



MINISTRY OF EDUCATION

Te Tāhuhu o te Mātauranga

He Kura Rangatira, He Kura Ākongā: Te Hua i Kitea Ai, Te Hua i Rite Ai

Te Kete Raukura [BES]

Viviane Robinson, Margie Hohepa, and Claire Lloyd
The University of Auckland

He Tāhū Kōrero



ITERATIVE BEST EVIDENCE SYNTHESIS PROGRAMME
<http://educationcounts.govt.nz/goto/BES>
New Zealand

Foreword

Te Akatea

Kua noho pārekereke mai a Te Akatea mō te kaupapa, He Manukura, He Hua Ākonga o Te Kete Raukura¹ (BES) mai i te tīmatanga, ā, mutu noa, i runga i te kaha ū, me te mārama hoki ki te pānga nui o ngā tikanga manukura ki te whai mātauranga, otirā ki te whai oranga o ā tātou tamariki katoa.

Ka whāia haeretia te kaupapa nei, ā, ka turuki, he take; ka paneke he whārua, ka mutu ka whakatakotoria he kōrero hei āwhina. Mā te pēnei, kua whai kāinga tō tātou reo, tō tātou āhua o te noho ki roto i te tuhinga kua tāia nei.

Ko te hiahia kia mau ngā whakatau a Te Kete Raukura i ngā manukura katoa o te mātauranga, kua anake i ngā tumuaki. Kei roto nei ko ngā hua papai o te rangahau hei papa kōrero mō te hunga ngaio ana te hihiri o te mahara, inā hoki kia hurihia ai ngā take pītaritari hei hua angitū kē. He nui hoki ngā kōrero kei roto hei āwhina i ngā kaiārahi ki te whakawhanaunga ki ngā hoamahi, ki ngā ākonga, ki ngā mātua, ki ngā whānau anō hoki, kia pono tahi ai, kia mana tahi ai te noho.

Ahakoā kei whea tātou e noho ana i te paepae manukura o te mōhio, o te pūkenga rānei, tērā e tawhiti atu ai te pae o te wānanga. E mea ana mātou ko tā Te Kete Raukura nei he whakatakoto i ngā kōrero taunaki pai ake, kāore ko ngā mahi pai ake, i te mea, tērā tātou e pai ake ai i roto i ā tātou mahi.

Kei te aronui atu ki te ngako tonu o Te Kete Raukura. Inā hoki, me whai wāhi nui ngā manukura ki te tuitui i ngā whānau ki ngā rau whaihua o te mātauranga. Mā te noho tahi pēnei e tūturu ai te whai tahi i te mātauranga, te kura, te kāinga, te hapori.

Me whakamihi rā a Tākuta Adrienne Alton-Lee mōna i whakapau kaha ki tēnei kaupapa. Māia ana tērā te ū ki tēnei mahi e whai wāhi ai ngā manukura me ngā kaiako ki ngā kete taunaki o te mātauranga e mārama pai ana ki a rātou. Ko tāna e whakapono nei, kia kai mai hoki te Māori i ngā hua o te mātauranga, ā, ko ia te tohu o te mahi tahi nā Te Tiriti o Waitangi i whakatau; he whiri tahi, he whaitahi i ngā huarahi ki te pae o te ora hei takahi mā te ākonga.

Ka mihi anō ki ngā kaituhi matua o Te Kete Raukura nei, arā, a Ahorangi Viviane Robinson rātou ko Tākuta Margie Hohepa, ko Tākuta Claire Lloyd. I mau anō i a rātou ngā tohu manukura o te rangatira, o te wānanga hoki hei raranga i ngā reo katoa i te kete nei, kia kotahi ai te ahu whakamua.


Debbie Marshall-Lobb
Shane Ngatai
Para Meha
Current and past presidents, Te Akatea

¹ Te kaupapa Whakairi i Ngā Kete Taunaki ki te Wharekōrero o Te Tāhuhu o Te Mātauranga


Tā Ngā Whakataunga

He Kura Rangatira, He Kura Ākonga:


Te Hua i Kitea Ai, Te Hua i Rite Ai: Te Kete Raukura [BES]



Tā ngā tohu ki ngā kura ākongā



Hononga kura-kāinga: Mā te aha e whai hua ai?



He Tāhū Kōrero

He kura rangatira—he kura ākongā

Tērā e whakaponohia whānuitia ana e te hunga tōrangapū, e te iwi whānui hoki, kāore i kō atu i te hunga arataki kura mō te pai, mō te tika, mō te kounga o te kura e whai mātauranga ai te rangatahi. Ko te whakatau a te kōrero nei he tautoko atu i tērā, he mana anō ō ngā kaiarataki e eke ai rānei te ākongā, kāore rānei. Heoi ko tā te kete kōrero anō he whakamōhio, he whakamārama, he whakaatu i ētahi whakaritenga e taea ai tēnei āhuetanga. Kāti, kia tīkina mai ana whakataunga e te hunga pānui hei pou tautoko, hei pou whakarea i ngā momo horopaki o te mahi ki te whakatipu i ngā tohu o te rangatira e manawaora ai te ākongā.

Ko ngā mahi e kōrerotia ana i te tāhū kōrero nei he mea i whakaritea ai mō te kaupapa Whakairi Kete Taunaki (BES) o Te Tāhuhu o Te Mātauranga, he kaupapa e whai māramatanga ana i ngā hononga o ētahi tikanga ake o te ao mātauranga ki te whānui o ngā hua i whāia ai e ngā ākongā. Kāti, kei te hāngai tēnei o ngā kōrero o tēnei kete ki te here whīwhiwhi i waenganui i te manukura wānanga¹ me ngā huanga ākongā, otirā ko te tikanga he whakamōhio i ngā āhuetanga rangatira me whakatū hei pouwhakapakari i ngā hua mō ngā ākongā i ngā kura reo Pākehā te reo kawē, reo Māori hoki te reo kawē.

Ahako te nui o ngā kōrero mō te amorangi wānanga, ka iti kē te paunga o te kōrero ki te hononga o ngā tikanga arataki ki ngā huanga ākongā. Kua tīkina atu ngā kōrero taunaki i ngā wāhi whānui e toru: (a) ngā aromatawaitanga o ngā pānga hāngai, ngā pānga huri hoki o ngā tikanga arataki ki ngā huanga ākongā, (b) ngā kōrero e whakaatu ana i te wāhi o ngā tikanga arataki hei āhuetanga wawao i te ako, me (c) te rangahau mō ngā hononga o te mōhioatanga, o te pūkenga, o te āhua hoki o ngā kai arataki ki ngā huanga ākongā.

Kāti, hei wāhi ake i tēnei kaupapa ka whakatakotoria ngā take matua e whakapātari nei i ngā manukura² i Aotearoa nei. Whai muri ka paku tirohia anō ngā tikanga i whakaritea ai hei whakamōhio i ngā hononga i waenganui i ngā tikanga arataki kura me ngā huanga ākongā. Kātahi ka kōrerotia ngā āhuetanga rangatira i hua mai ai i tā mātou whakamātautauranga i ngā kōrero taunaki (ngā kōrero hāngai, huri hoki) e tūhono ana i ngā tikanga arataki kura ki te huanga ākongā. Ka whakarāpopotohia ngā whakataunga matua i hua ake ai i tā mātou tātarihanga i ngā kōrero taunaki mō te pānga o ngā momo hononga kura-kāinga ki ngā ākongā. Heoi ka kōrerotia ngā momo mōhioatanga, pūkenga, āhua anō hoki e tohu ana i roto i ngā āhuetanga rangatira whaimana nei. Hei whakakapi ake ka whārikihia atu ngā kupu matua o Te Kete Raukura nei.

He toa takimano

Kei te Upoko 2 te whānuitanga atu o ngā kōrero mō ngā huanga. Ko te whakatutukitanga, ko te haumarū ākongā, ko ngā tohu mātauranga o te kura tuarua hoki ētahi o aua kōrero.

E ai ki te whānui o ngā tirohanga o te ao (pērā i PISA, TIMSS, me PIRLS) me whakahīhi pai anō tātou ki tō tātou ake whare mātauranga: he autāia tonu ngā taurite o ngā whakamātautau mō te pānui, mō te pūtaiao me te pāngarau o ngā ākongā 15 tau te pakeke.

Engari, ka hinga kē i te awanui i waenga i te hunga kāore i eke, me te hunga ka eke i ngā taumata angitū, mō te pānui tonu te take. E ai ki ngā rangahautanga o nātata nei, tērā ngā maunganui hei piki mā te ākongā kia eke ngā tihi o te pāngarau, o te pūtaiao, o te pānui i ngā kura tuatahi. Kei te tītaha kē te waka, ā, ka raru ko ngā iwi tamariki e tere tipu ake nei, arā, pērā i te iwi Māori me ngā iwi o Te Moananui ā-Kiwa.

¹ Ngā āhuetanga arataki i te mātauranga

² He kupu mō te kaiarataki, heoi tīkina atu ko te ‘manukura’ hei kupu poto mō ‘ngā kaiarataki i te mātauranga’, ka kīa ai ko te mātauranga he kura, arā, he mea nui nei te wāriu, he kupu kua tangatawhenua nei ki te ‘school’.

Ka aronui atu ngā kōrero o taua upoko ki ngā take whakapātaritari e whā mō te hunga arataki kura me te hunga e tautoko ana i ā rātou mahi.

Heoi he nui nō te rerekētanga o te whakatutukitanga i ngā kura, ko te kaupapa matua hei whai mā ngā manukura i te ao mātauranga, ko te whakapiki ake i te hunga e whakatutuki ana, me te whakaiti anō i te rerekētanga kua kōrerotia ake nei kia rite katoa ai ā tātou ākongā ki te ahu whakamua.

Ko te tuarua o ngā take whakapātari ko te kaha whāngai mātauranga ki ngā ākongā Māori kia pai ake ai, kia māia ake ai. Hei tā ngā kōrero o nātata nei he pai kē atu te manaaki a ngā kura reo Māori nei te reo kawē i ngā ākongā Māori, i ngā kura reo Pākehā nei te kawē i ētahi o ngā kaupapa ako i te kura tuarua ahakoa ngā whakawai whīwhiwhi o ngā take whakarauora reo.

Tuatoru, ko te whakakaha ake i ngā tikanga manaaki tangata, otirā ko te whakakaha i ngā taura whanaunga i waenganui i ngā ākongā.

Tuawhā, ko te whakarerekē i ō tātou whakaritenga kura mana motuhake nei kia whai rangatira tōtika tonu, ā, kia wātea ai rātou, kia tautokona anō hoki ki te whakatika atu, ki te whakataki atu i ngā take e toru kua takoto ake nei.

Te kawa

E āta whakaatu tahi ana te Upoko 3 me ngā wāhanga whakataki o te Upoko 4 me te 5 ko te kawa me ngā tikanga rautaki i tīkina atu ai hei pou whakawetewete i te whare kōrero.

He momo ritenga whakamana tēnei mea te tikanga arataki ki tā te kawa ō tēnei o ngā kete raukura (BES). He mea hāngai rānei, pērā i ngā wā e mahi tahi ana ngā rangatira tētahi ki tētahi, he mea huri kē rānei pērā i ngā wā e whakarerekē ana rātou i ngā whakaritenga mahi a ētahi atu. Nō runga i tēnei, he mea pupuri te tikanga arataki i roto tonu i ngā momo mahi, āhuetanga hoki, ā, he mea hora anō ki ngā tāngata. Heoi ko te āhua o te ‘tikanga arataki’ o tēnei o ngā kete raukura (BES) ko te mana o te hunga whai tūranga whai tikanga (pērā i te tumuaki, te kaiwhakahaere matua, ō-waenga rānei, te kaitiaki kura, te kaumātua, te kaiwhakatakoto kaupapa here rānei), ko te mana hoki o te hunga whai rangatiratanga noa nei.

Ka wetewetekina ngā kōrero taunaki i runga i te āhuetanga o ngā pātai matua e toru mō te hononga i waenganui i te rangatiratanga me ngā huanga ākongā:


Ko ngā whakataunga e pā ana ki te pātai 1 kei ngā upoko 4 me te 5 e noho ana; ko ērā e pā ana ki ngā pātai 2 me te 3 kei ngā upoko 6, 7 me te 8 e kōrerotia ana.

1. He aha ngā pānga o ngā momo tikanga arataki ki ngā huanga ākongā?
2. He aha te wāhi ki te tikanga arataki i roto i ngā kaupapa wawao, whakapakari hoki hei whakapiki ake i te ako o ngā ākongā i Aotearoa?
3. He aha ngā momo mōhiotanga, pūkenga, tūāhua hoki me mau i te hunga arataki kura hei whai i ngā mahi kua tohua ake i ngā pātai 1 me te 2?

E āta whakamāramatia ana i te Upoko 5 me ana tāpiritanga ko te kawa i whakaritea ai hei tikanga whakahua ake i ngā tohu, hei tikanga whātau hoki i te rahi o ngā pānga o ngā momo āhuetanga o te rangatiratanga.

Heoi ka rapuhia, ka kitea hoki ngā kōrero taunaki kua tāia e pā ana ki ēnei pātai e toru i ngā pātaka kōrero o Aotearoa me te ao whānui hoki. Ko te rahi, 134 ngā putanga rangahau, 61 o ēnei nō Aotearoa. Ahakoa 27 noa iho o ēnei i whakapuaki i te nui o te hononga i waenganui i te tikanga arataki me ngā huanga ākongā, tērā anō te 100 i whakaatu mai i te kounga o ngā kōrero mō ngā āhuetanga o te rangatiratanga. Kei roto i tēnei rahi ko te 31 o Aotearoa i aronui atu ki te wāhi o te tikanga arataki mō te ārahi i ngā kaupapa whakapakari i te whakaako me te ako (Upoko 6). Tāpiri atu ki tēnei, ka noho ko ngā putanga rangahau 21 o te ao, 16 o Aotearoa hei tāhū mō Upoko 7 mō te pānga o ngā momo hononga kura – kāinga ki ngā huanga mātauranga, tikanga tangata hoki. Ka mahue ko te toenga o ngā kete kōrero 134, 25 o te ao, 13 o Aotearoa, hei papa kōrero mō Upoko 8. E rua ngā tikanga rautaki matua i whiriwhiria hei tātari i te putunga kōrero taunaki nei.

Ka whakaritea ko te *rautaki whakamua* e tohua ana i te hau ō-runga o Huahua 1 hei whakautu i te pātai 1. Ko te take i kīa ai ko te ‘rautaki whakamua’, ka tīkina atu tētahi ritenga arataki hei tīmatanga, ā, ka whakatakina haeretia ōna hononga ki ngā huanga ākongā. 27 ngā putanga rangahau i whai i tēnei rautaki, he ritenga arataki, he momo huanga ākongā kei roto. Ka āta tātarihia ngā putanga rangahau nei kia kitea ai te pānga o ngā momo tikanga arataki ki ngā huanga mātauranga, tikanga tangata hoki.



Huahua 1. Ngā tikanga rautaki matua e rua kia kitea ai te pānga o te tikanga arataki ki ngā huanga ākongā

I tētahi o ngā tātāritanga, ka whakatauriteritea e mātou te pānga o ngā kaupapa whakaaro e rua mō te tikanga arataki e mōhiotia whānuitia ana, ko te amorangi whakaumu me te amorangi kaupapa. I hua mai te amorangi whakaumu i ngā tuhinga pakihi, ā, ka whakanuia ngā tikanga pērā i te tūtoro me te māia anō ki te whakahihiri, ki te whakapiripiri, ki te whakamanawanui, ki te whakamahi. Ko tā te amorangi kaupapa he aro kē ki te whakauru o te hunga arataki ki ngā mahi whakaako, ako anō hoki. Kei te tuarua o ngā tātāritanga, ka whāia kia kitea te pānga ake o ētahi āhuatanga rangatira ka tohua ake, ki ngā huanga ākongā. E rima ngā tohu i hua ake ai i te pātaka whakairinga kōrero whaimana. Kātahi ka tātāhia e mātou te āhua o te rahinga taurite o te pānga o ia āhuatanga.

He iti noa ngā rangahautanga o Aotearoa e whakaatu ake ana i te hononga o te tikanga arataki kura ki ngā huanga ākongā. Nā reira ka toko ake te pātai, ka whai take rānei ngā āhuatanga rangatira i hua mai ai i te tātāritanga o te rautaki whakamua ki te āhua o Aotearoa, otirā ki ngā kura reo Māori nei te reo kawae. Nā te kore o te kōrero e hāngai ana ki tēnei ka huri kē ki te rautaki whakamuri i whakaaturia mai i te hau ō-raro o Huahua 1, hei whakautu i te pātai 2. Ka tīmata te rautaki nei ki ngā putanga rangahau mō ngā kaupapa wawao i whai hua pai ai ngā ākongā. Ka tikarohia ake he whakaaro i ngā whakaaturanga kōrero mō te wāhi o te tikanga arataki (whānui ana te horapa) hei papawhāriki e tipu mai ai aua huanga. Ka āta whakatakina haeretia te tātari i ngā tikanga arataki i ngā kura me ngā akomanga o Aotearoa, ā, ka ono ngā āhuatanga i puta mai. I te mea he kounga te tikanga o ngā whakaaturanga kōrero, kāore i taea e mātou te whakamōhio atu te rahi o ngā pānga o ngā tohu nei ki ngā huanga ākongā.

E 37 anō ngā putanga rangahau i tātaria, 16 o Aotearoa, hei whakamōmona i ngā rautaki whakamua, whakamuri hoki kia mōhio ai nga rangatira he aha ngā mea whai pānga nui i ngā hononga kura-kāinga.

Te pānga o ngā momo tikanga arataki

Ko te pātai nui ko tēnei: ‘He aha te pānga o ngā momo tikanga arataki ki ngā huanga ākongā?’ E rua ngā rangahautanga mō te rangatiratanga i wānangahia hei whakautu i te pātai nei.

Tuatahi, ka whakatauriteritea e mātou te pānga mai o te amorangi whakaumu, o te amorangi kaupapa hoki. Ko te hua mai ka kitea e tata whā rahinga atu te pānga o te kaupapa i te pānga o te whakaumu. Ko tā te whakaumu he whakanui i ngā āhuetanga tūtoro, whakahihiri hoki, heoi anō tā te kaupapa he hāngai kē ki te whakatakoto i ngā whāinga mātauranga kia mārāma, he whakamāherehere i te marautanga, he aromatawai hoki i ngā kaiako me te whakaako.

Heoi anō, i te mea ko te tūhononga te tino aronga o te amorangi whakaumu, ā, ko te take mātauranga te aronga nui o te amorangi kaupapa, tērā pea he hua anō o ngā tikanga e rua. Ko te mea kē kia kua tētahi e tuki i tētahi. Otirā tērā e kapo nei tētahi kaupapa i ngā tikanga o tētahi atu, ka whai a Whakaumu i ngā tikanga mātauranga, a Kaupapa i ngā tikanga whanaungatanga pērā i te whakatau tahi i ngā whāinga mō te kura.

Tuarua, ka āta wetewetekina te pānga o ētahi āhuetanga rangatira ki ngā huanga ākongā. E rima ngā āhuetanga i hua ake ai i aua rangahautanga anō i whārikihia mai mō te tātarihanga i kōrerotia ai i mua atu rā. Kia mahara ake kāore i wehea ngā āhuetanga whakaumu, kaupapa hoki. Kei roto ngā mea e rua i ia āhuetanga.

E whakaatu ana a Huahua 2 i te pānga o ia āhuetanga ki ngā huanga ākongā. Ka takiruatia te nui o te pānga³ o te āhuetanga 4 (Ko te waka mātauranga, he waka eke noa) i ērā atu o ngā āhuetanga. He iti ki te āhua nui atu te pānga o Āhuetanga 1 (Whāia te iti kahurangi) me Āhuetanga 3 (Kia pai te whakaterere i te waka). He iti te pānga o Āhuetanga 2 (Mā te huruhuru ka rere te manu) me Āhuetanga 5 (Ka tika āmuri, ka pai ā mua).

He rite ētahi wāhi o ngā āhuetanga e toru o te rima i hua ake ai i te whai i te rautaki whakamua, ki ērā i hua ake ai i te rautaki whakamuri i roto i tātarihanga i ngā mahi rangahau kei reira ngā kōrero taunaki huna mō te pānga o te tikanga arataki. Ko te aronga o ngā āhuetanga e toru nei ko ngā tikanga arataki e pā ana ki te whakatakoto whāinga, te whāngai, me te ako o te kaiako.

E toru anō ngā āhuetanga i hua ake ai i te tātarihanga i ngā kōrero taunaki huna mō te tikanga arataki. Ko te aronga o ēnei āhuetanga ko te whiriwhiri i ngā muka wānanga kia pakari ake, ko te kuku atu ki ngā kōrero whakatau take, ko te whiriwhiri, ko te whakamahi i ngā tapu ngaio.

Kei Upoko 5 me ōna tāpiritanga te kōrero e tino whakamārama ana i ngā whakaritenga i whiriwhiria ai hei tātai rahi pānga mō ngā momo ritenga arataki, i whiriwhiria ai hoki ngā āhuetanga.

Kei Upoko 6 ngā whakamāramatanga me ētahi kōrero e whakaatu ana i ngā mahi rangatira i whakawhāititia ai i te rautaki whakamuri.

³ Ko te nui o te pānga he ine kua whakaritea mō te kaha o te here i waenganui i ngā momo tikanga e rua. Ko aua momo tikanga i roto i tēnei kete kōrero (BES) he wāhanga mō ngā ritenga amorangi, wawaotanga amorangi rānei, me ngā whakatutukitanga ākongā. Ka nui atu te pānga, ka nui atu anō te awe mai o te ritenga, o te wawaotanga rānei ki te huanga mai e hiahia ana. Ka whāia ko tā Hattie (2009) hei āwhina i ā mātou ki te whakamārama i te nui o ngā pānga: .2, iti; .4 āhua nui; .6 nui. Ko tā Hattie rangahau, .35 te whakatutukitanga wawaenga o te ākongā inā pau ai te kotahi tau ki te pānui, ki te pāngarau, ki te tuhihi hoki. (Tirohia te Upoko 5)




Figure 2. Tā ngā āhuatanga e rima ki ngā kura ākonga

Ahuatanga 1 Whāia te iti kahurangi	<i>Seek the treasure that is valued most dearly</i>	Dimension 1 Establishing goals and expectations
Ahuatanga 2 Mā te huruhuru ka rere te manu	<i>It is the feathers that enable the bird to fly</i>	Dimension 2 Resourcing strategically
Ahuatanga 3 Kia pai te whakatere i te waka	<i>Steer the waka well</i>	Dimension 3 Planning, coordinating, and evaluating teaching and the curriculum
Ahuatanga 4 Ko te waka mātauranga, he waka eke noa	<i>The waka of knowledge is the waka for everyone</i>	Dimension 4 Promoting and participating in teacher learning and development
Ahuatanga 5 Ka tika ā muri, ka tika ā mua	<i>If all is right at the back, all will be right at the front</i>	Dimension 5 Ensuring an orderly and supportive environment
Ahuatanga 6 Ehara taku toa i te toa takitahi engari he toa takitini	<i>My strength is not mine alone but that of the multitudes</i>	Dimension 6 Creating educationally powerful connections
Ahuatanga 7 He kaha ki te whakahaere i ngā raruraru	<i>Able to mediate, manage, and settle disputes</i>	Dimension 7 Engaging in constructive problem talk
Ahuatanga 8 Ngā tapu ngaio. Whiria, mahia	<i>Choose and use specialist tools</i>	Dimension 8 Selecting, developing, and using smart tools

Figure 3. Ngā āhuatanga rangatira

Mō Huahua 3, ko ngā āhuatanga hāngai ko 1–5, ko ngā āhuatanga huri ko 6–8. Ka whakataukītia ko ia āhuatanga kia mau ko te tikanga o te kōrero. Ehara i te mea me whai tōtika i ngā āhuatanga e waru nei engari ka noho kē hei tohu rangatira. Me whai whakaaro ki te katoa i ngā wā katoa, engari he wā ka hāngai te whakaaro ki tētahi i runga i te take ka heipū noa mai.

Kāti, hei te mutunga iho ko tā mātou i whakatau ai he nui rawa te pānga mai o te amorangi kaupapa ki ngā huanga ākonga. Ki te aronui atu te hunga arataki ki te whakapau i ō rātou whakaaro, i ō rātou mātauranga, i ō rātou hononga ki ngā kaiako ki te kaupapa nui o te whakaako me te ako, ka nui atu anō ō rātou pānga ki ngā huanga ākonga.

Ngā āhuatanga rangatira i hua hāngai mai i te whare taunakitanga⁴

1. Whāia te iti kahurangi

Ko te āhuatanga nei ko te tohu i te rangatiratanga mā te whakatakoto whāinga, mā te whakamōhio hoki i aua whāinga mō ngā kaiako me te ako o te ākonga. Ka taurite te noho tuarua o te nui o te pānga wawaenga o tēnei āhuatanga (.42). Me kī, he āhua nui, he nui anō te pānga pēnei te rahi.

Me pēnei te hunga arataki e whakarite tōtika ai ngā whāinga:

- me whai mana ngā whāinga;
- me mārama ngā whāinga;
- me ū ngā kaiako ki ngā whāinga.

Ka whakamanahia te hiranga o ngā whāinga e te hunga arataki mā te whakamōhio atu i ngā hononga ki ngā take ā-kaupapa, ā-whakaaro, ā-tikanga hoki. Ka poapoatia kia whakaae tahi mai he whāinga ēnei e taea te whakatutuki, ā, me ū tahi e tutuki tahi ai. Ka tino whai tikanga te whakatakoto whāinga ki ngā kura kaupapa reo Māori te reo kawē. Ko te take kei te tino kitea atu te hononga o ngā whāinga hiranga nei ki ngā take whānui o te whakaaro, o te tikanga hoki, arā, ko te reo Māori, ko te whakarauora hoki i ngā tikanga Māori.


Tārake ana tērā te kite he mea nui te whanaungatanga mō tēnei āhuatanga, i te mea ka mātua whakarite ngā kaiarataki o ngā kura iti kahurangi⁵ ki te whakamōhio i ngā whāinga me ngā hiahiatanga, ki te whakamōhio i te iwi mō ngā whiwhinga mātauranga, ki te whakamihi anō hoki i ngā whakatutukitanga o te wānanga. E kī ana ngā kōrero taunaki kei te ohu kaiako te tikanga menā ka eke rānei te kura ki ōna taumata, ka hinga rānei.

Me mātua mārama te hunga arataki ki te hiranga o te whakatakoto whāinga me te mōhio hoki me pēhea e whai hua ai te whakatakotoranga whāinga, mā konei e rangatira ai te mahi, e rangatira ai tēnei āhuatanga. Mā Huahua 4 e whakamārama mai ngā tikanga whakamana, ngā kawa hei whai, ngā hua hoki o te whakatakoto tika i ngā whāinga.

⁴ Robinson, V. M. J., Lloyd, C., & Rowe, K. (2008). Te pānga o te rangatiratanga ki ngā huanga ākonga: He wānanga i ngā rerekētanga o ngā pānga o ngā momo āhuatanga o te rangatiratanga. Te Whakaputanga Koata-Tau mō Te Whakahaere Mātauranga (44)5, wh. 635–674. [Nō te tau 2008, ka whiwhi te tuinga nei i te Tohu Davis mō te kōrero tino whaimana i roto i Te Whakaputanga Koata-Tau mō Te Whakahaere Mātauranga o 2008.]

Robinson, V. M. J. (2007, 11 Oketopa). He kura rangatira, he kura ākonga: Te hua i kitea ai, te hua i rite ai. He kauhou i whakaritea ai mō te kaupapa Wiremu Waaka. Ka kauhoutia i te Wānanga Huitahi o Te Kaunihera o Ngā Kaiarataki Mātauranga o Ahitereiria me Te Huinga mō Te Tohutohu me Te Whakatipu Marautanga i Poihākena. www.educationcounts.govt.nz/publications/series/2515/13723

⁵ He kura e whai ana i te iti kahurangi o te ako.



Huahua 4. He aha ngā tikanga o te whakatakoto whāinga?

E ai ki ngā kōrero taunaki, he mea nui ngātahi ko ngā whāinga ake me te whakaritenga hei whakatakoto whāinga: me mōhio te hunga arataki he aha ngā whāinga hei whakatakoto, ā, me pēhea hoki te whakarite atu. He nui te aronga atu ki ngā whāinga mātauranga i ngā kura iti kahurangi nei, heoi ehara i te mea ka mahue kē ko ngā whāinga tikanga ā-iwi.

2. Mā te huruhuru ka rere te manu

Ko tā te tikanga arataki anō ko te whai, ko te tuku rauemi, arā, ngā rauemi taputapu, mātauranga, tangata anō hoki. Ko te tikanga kē ia ko te tōtika o te whai, kaua e whai noa mō te whiwhi noa iho engari me whai, me tuku hoki i runga i te wāhi o te rauemi ki te take o te kaupapa. Kāore i tua atu i ngā kaiarataki mō te āwhina i ngā kaiako ki te whai, ki te whakatipu hoki i ngā rauemi whakaako, ako anō e tika ana, i ngā taumata katoa o te mātauranga, me te whakatikatika hoki kia rite ngā rauemi nei mō te whakamahi. He iti noa te pānga wawaenga o tēnei āhuetanga ki ngā huanga ākonga. Me uaua kē kia kitea e te hunga arataki he rauemi aromatawai e rite ana ā-kaupapa, ā-whakaaro nei ki ngā whāinga nui o ngā kura kaupapa reo Māori te reo kawē. Hei tauira, he ruarua noa ngā ritenga aromatawai i roto i te reo Māori, he ruarua hoki ngā huarahi ki ngā kaupapa whakapakari kaiako mō te aromatawai mā te reo Māori.

Ko tā te hunga arataki i ngā kura iti kahurangi mō te tohu, mō te whiwhi rauemi:

- me mārama ngā whakaritenga kia hāngai ki ngā tikanga ā-kaupapa, ā-whakaaro hoki;
- me ukauka te whāngai i ngā whāinga ā-kaupapa matua ki te moni.

Mārama ana te hunga arataki ki ngā whakaritenga hei tohu, hei whakawhiwhi rauemi hoki e hāngai ana ki ngā tikanga ā-kaupapa, ā-whakaaro anō. Ka tohe whakauka anō rātou ki te whai moni hei tautoko i ngā tikanga ā-kaupapa mā te whakarite pēnei i te whakapapa i te whakapaunga moni. Ka hao anō i roto i te kete whakahāngaingai rauemi ko te whai i ngā kaimahi e tika ana, ko te whakatipu i ngā momo tohungatanga hei whakatutuki i ngā whāinga nui.

3. Kia pai te whakaterere i te waka

Ko te aronga o tēnei o ngā āhuetanga ko te kaha whai a te hunga arataki ki te whakapiki ake i te kounga o te whakaako me te marautanga. He rite te pānga wawaenga o tēnei ki tērā o Āhuetanga 1, arā, he āhua nui, he nui rānei te pānga o ēnei whakaritenga arataki ki ngā huanga ākonga. Ko te mea e rangatira atu ai ngā kaiarataki i ngā kura iti kahurangi i ngā kaiarataki o ngā kura e rite ana te āhua atu i te kiko o te whai, ko te whakauru ki roto i ngā mahi whakamahere, whakariterite, me te mahi aromatawai i te whakaako me ngā kaiako.

Ko tā ngā kaiarataki i ngā kura iti kahurangi mō te whakamahere, mō te whakariterite, mō te aramatawai hoki i te whakaako me te marautanga:

- ko te whakanui i ngā whakawhitinga kōrero mō te whakaako me tōna pānga ki ngā huanga ākongā;
- ko te ārahi, ko te whakariterite hoki o te kaupapa whakaako;
- ko te mātakitaki i ngā mahi i roto i ngā akomanga me te whakahoki kōrero e kīa ai e ngā kaiako he kōrero whaikiko;
- ko te whakarite tikanga tiroiro i te pikinga ākongā me te whakamahinga hua aromatawai hei whakapakari ake i te kaupapa ako.

4. Ko te waka mātauranga, he waka eke noa

O ngā āhuatanga katoa i hua ake ai i te wānanga koinei te āhuatanga pānga nui, arā, koinei ngā whakaritenga arataki nui rawa te pānga whai mātauranga ki ngā huanga ākongā. Ko ngā whakaritenga o tēnei āhuatanga, ko te whakauru atu, ko te whakanui hoki i ngā take whakapakari ō-kawa, ōpaki anō i ngā kaiako. Ka noho te hunga arataki i roto i ēnei mahi whakapakari kaiako hei kaiarataki, hei ākongā rānei.

He mea nui ngā rerekētanga mō tēnei āhuatanga i waenganui i ngā mahi a ngā kaiarataki o ngā kura e rite ana te whai mātauranga, nui atu rānei, iti iho rānei. Hei tauira, hei tā ngā kaiarataki i ngā kura iti kahurangi, ka hāngai te mahi tahi a ō rātou kaiarataki ki ngā kaiako, ki ngā kaiwhakahaere tari hoki ki te whakamahere, ki te whakariterite, ki te aromatawai hoki i ngā kaiako me te whakaako. Tērā tonu pea ka nui kē atu te kiko o ngā mahi arotake a ēnei momo kaiarataki i ngā kaiako – me te mea nei ka tiroirohia te pikinga o te ākongā, ā, ka pai ake te whakaako i runga i ngā hua o te aromatawai. Nui atu te mōhio o te hunga arataki e kaha uru atu ana ki ngā kaupapa whakapakari kaiako ki ngā whakaritenga me whai kia pikimauroa ake ai te ako o te ākongā. Mā konei e taea e rātou te kōrero ngātahi ki ngā kaiako mō te whakarerekē i ngā kaupapa ako, ā, me te tautoko hoki kia rerekē ai te whakahaere akomanga, te whai rauemi, ngā whakaritenga aromatawai hoki.

Ko tā te arataki he whakanui i te whakaako mā te aronga o te hāpori ki te whakapakari i ngā ākongā kia ekea ō rātou taumata. Ki te pēnei ngā hāpori, me wero ngā kaiarataki i ngā tikanga o te hāpori kāore i te hui ki te kōrero mō te hononga i waenganui i ngā whakaakoranga me ngā mea e ākona ana, kia huri kē.

Ko te ohu manaaki, tiaki hoki i ngā whakatutukitanga me te ora anō o ngā ākongā tētahi tikanga nui o ngā hāpori tōtika. Ka piki ake ngā huanga ākongā, ka kaha ake anō te māia me te tikanga ohu o te hunga kaiako, ā, mā tēnei e kaha ake ai rātou ki te ū ki te mahi. Ka mutu ka hua mai te pai i a ia anō, he māia, he mōhio nō te kaiako, he angitū mō te ākongā, tautoko tētahi i tētahi.

Ko tā ngā kaiarataki i ngā kura iti kahurangi mō te whakanui me te whakauru ki ngā kaupapa whakapakari kaiako:

- he whakarite kia tino mau te whakaaro ki te here o te whakaako ki te ako;
- he whakanui i te ohu manaaki, i te ohu tiaki i ngā whakatutukitanga me te ora o ngā ākongā;
- he whai kupu tōtika hei āwhina mō te whakatau i ngā take whakaako.

5. Ka tika ā muri, ka tika ā mua

Ko tētahi āhuatanga o te tikanga arataki he āwhina ki te whakatutuki i ngā whāinga nui o te mātauranga me ngā tikanga ā-iwi mā te whakatakoto i tētahi whāriki hei papa manaaki i ngā tikanga o te angitū. Ki te tau te mauri o te wāhi ako ka ū ngā kaiako ki te whakaako, ka aro ngā ākongā ki te ako. He iti noa te pānga wawaenga o tēnei tūāhuatanga, te āhuatanga i hua mai i ngā rangahau mō te whakamahere whakamua. Ko ngā tohu o tēnei āhuatanga he mōhio

ki ngā tikanga ā-iwi, he whakamihi hoki i ngā rerekētanga; he whakarite kia haumarū ai, kia noho tika ai te wāhi, kia mārama hoki te kawa o te whakawhiu; kia iti noa ngā haukotanga i te takiwā o te whakaako. Ko ētahi atu o ngā tohu ko te tiaki i ngā kaiako kia kore ai e raru i ngā taumahatanga korekiko o ngā mātua, o ngā mana whakahaere hoki, me te whai tikanga whakatau wawe i ngā tohe kia tōtika ai.

E ai ki ngā whakataunga, ka tutuki i ngā kaiarataki o ngā kura tōtika ngā wāhi haumarū, whakaruru hoki te whakatū i runga i te mārama, i te ū hoki ki te whakahau i ngā hiahiatanga ā-iwi, i ngā kawa anō o te whakawhiu.

Ki te pēnei te wāhi, tika ana te tere whakatau i ngā tohe kaiako. E ai ki te whakataunga a tētahi o ngā kōrero rangahau, he kaha te here o te mōhio o te tumuaki ki te whakatutukitanga o ngā ākongā i te pāngarau, arā, tana kite me tana whakatau i te raru – kia kaua e tukuna kia pirau kē. Ko tētahi āhuatanga anō e kitea ai te rerekētanga o ngā kura kaha whai i te iti kahurangi i ngā kura e hinga kē ana, ko te rerekētanga o te whakaaro o te kaiako ki tērā o te tumuaki mō te kitenga a te tumuaki i ngā tohe me te whakatau anō i aua tohe.

Ko tā ngā tumuaki i ngā kura iti kahurangi mō te whakarite i te wāhi hei wāhi manaaki, tautoko hoki:

- ko te tiaki i ngā wā ako o te kaiako;
- ko te ū ki ngā whakaritenga whakawhiu;
- ko te tere mōhio, ko te whakatau tika hoki i ngā raru.

6. Ehara taku i te toa takitahi, engari he toa takitini

He tūhonohono te tikanga o tēnei āhuatanga, i waenganui i – ngā tāngata, ngā rōpū, me ngā iwi – e hāngai tika ana ki te ako o te ākongā.

Tautoko ai te hunga arataki i ēnei tūhononga mā te rite o ngā kaupapa me ngā whakaaro i waenganui i ngā kawenga mai a te ākongā me tāna kawenga anō i roto i te akomanga. Tērā pea mā te mōhio haere ki ngā momo wheako o te ākongā i te kura hei tikanga tuatahi mō te whakapakari i te whakaako me te ako. Tērā tonu pea mā te whakarerekē i ngā tikanga o te kura ka pai kē atu te tūhono ki ngā whānau me ngā iwi o te kura.

Tū ngātahi ai ngā kaupapa whakaaro menā ka rite te whakapapa o te kawenga me tērā o te tikanga o ngā akomanga e whakawhitia ana e te ākongā. Ka whai wāhi anō ngā kaiarataki ki tēnei āhuatanga mā te whakamaui i ngā ākongā ki te tāhū kotahi i a rātou e whakawhiti kura ana.

Ka noho pūmau ana te tikanga whakawhanaunga ki ngā āhuatanga katoa, ka whai mana anō ngā tūhononga. Ka whai tikanga anō te whanaungatanga hei tikanga whakapiki mōhio, whakamihi anō mō te mana tangata me te mana iwi. Me whakapakari hoki ngā tūhononga i waenganui i te hunga pakeke hei āhuatanga whakanui, whakaora anō i ngā ākongā.

Whakakaha ake ai te hunga arataki i ngā tūhononga mātauranga mā:

- te here i te mana ākongā ki ngā tikanga o te kura kia ngāwari ai te hono;
- te whakarite kia rite te tāhū kawenga me te tāhū tikanga o ngā kaupapa whakaako;
- te whakatika i te whakawhitinga i tētahi kura ki tētahi atu kia ngāwari ai.

7. He kaha ki te whakahaere i ngā raruraru

Ko te tikanga o tēnei āhuatanga he mātau ki te whakamōhio, ki te whakamārama, ki te wānanga hoki i ngā raru kia kitea he putanga mō te kura. Ko tā ngā kaiarataki whakamoe patu he whakamahuki i ngā take i runga i te āhuatanga kia whai wāhi mai ai te hunga tohe ki te raru, kia mau anō i a rātou te take o te raru. Mā te mātua wānanga i te kaupapa whakaaro o te mahi kia tīnīhia e taea te āhuatanga nei te whāwhā atu.

E rua ngā take e whaimana ai ngā kaupapa whakaaro o te mahi; tuatahi e whakamārama ana i ngā mahi a te kaiako, tuarua e whakaahua ana me pēhea e mārama ai ngā karere whakataka. Mā te tiki atu i ngā kaupapa whakaaro o ngā kaiako ka taea e ngā tumuaki ngā kaiako te āwhina ki te whakamahuki rawa ake i ō rātou i whakapono ai, ā, ki te aromātai hoki i aua whakapono i raro i tētahi kaupapa whakaaro kē e whārikihia ana. Ka tutuki ngā kaupapa whakaaro menā e tino mōhiotia ana ngā āhuetanga whakauka kia ū tētahi ki tāna e mahi ai, ā, ngā whakapātaritaringa kia huri kē ai taua mahi. E ai ki ngā kōrero rangahau o Aotearoa i tirohia rā, he nui ngā kōrero taunaki e tohu ana i te nui o ngā hua papai o te ruku whakaaro mō ngā whanaungatanga pakeke me ngā huanga ākongā.

Ko tā ngā kaiarataki whai i ngā kōrero whakatau raru:

- he kite i ngā take e mahi ai ngā kaiako i ngā mahi e hiahiatia ana kia tīnīhia (te ruku i ngā kaupapa whakaaro o ngā kaiako);
- he ārahi i ngā kōrero mō ngā hua taurite o te whakaritenga mahi e whāia ana, me ngā whakaritenga mahi rerekē.

8. Ngā tapu ngaio. Whiria, mahia

Ko te tikanga o tēnei o ngā āhuetanga ko tā te hunga arataki whakariterite i te akomanga i runga i te whiriwhiri, te whakatipu, te whakamahi hoki i ngā tapu ngaio me kī, i runga anō hoki i te whakatakoto i te kawa hei whakamahi i aua tapu ngaio. Ko te āhua o te tapu ngaio nei he whānui rawa, arā, ko ngā taputapu pērā i te papa tuhituhi mā, ngā taputapu noho hoki o te rūma, ngā pūmanawa rorohiko hei whai i ngā putanga ākongā, i ngā kōrero aromatawai hoki; ngā tuhinga kaupapa here, tae atu ki ngā puka pūrongo. Ehara i te mea ka noho anake te hunga arataki ki te whiriwhiri, ki te whakatipu i ngā tapu ngaio nei engari me whakarite tonu rātou kia whaitake aua taputapu ki te āwhina i te hunga whakamahi e tutuki atu ai ngā mahi e whāia ana.

Ka kīa ai he kamakama ngā tapu ngaio menā ka whakamihia te ako o te kaiako mō te whakanui i te ako o te ākongā. He mea hua mai ngā momo tapu ngaio nei i ngā kaupapa whakaaro tōtika mō ngā mahi e hiahiatia ana kia tautokona, ā, he mārama, he ngāwari hoki te whakamahi. He rerekē te puka pūrongo pai nei i te kaupapa here pai mō te pūrongo. Heoi ahakoa te rerekētanga, e rua ngā tikanga e whāia ngātahitia ana: he mea hua i te kaupapa whakaaro tōtika, he tōtika hoki te huahuetanga mai.

Tērā e whaihua ai tētahi tapu ngaio mō te whakaako i tētahi rōpū ākongā, engari ka koretake noa nei mō rōpū kē. Hei tauira, kāore pea e tika te kaupapa whakaaro mō te whakapiki reo i ngā akomanga reo Pākehā hei kaupapa whakaako i ngā akomanga reo Māori, reo Pahiwhika rānei.


Mā te nui o te whakapaunga ki te rangahau, ki te whakawhanake hoki ka tika mai ētahi tapu ngaio hei whakamahi. Ko ētahi atu kāore i pērā rawa te huarahi whakatipu, he mea hanga noa ake mō te kura, heoi ahakoa tēnei āhuetanga me whakamātautau tonu te hunga arataki i te mana o ngā kaupapa whakaaro e whāriki ana i ngā tapu ngaio e rua nei.

Ka whiriwhiria, ka huahuetia ngā tapu ngaio e te hunga arataki:

- i runga i te mōhio he tōtika te kaupapa whakaaro;
- i runga i te tika o te huahuetanga.

Te whiri kaha a toi

Ko tā Upoko 7 he tiroiro tonu ki ngā kōrero mō te Āhuetanga 7 mā te tātari i ngā kōrero o Aotearoa me te ao mō ngā pānga o ngā momo hononga kura-kāinga ki ngā huanga ākongā. Ka whakarāpopototia ēnei tirohnga i Huahua 5. Ko tāna e whakaatu ai, ka nui rānei, ka iti rānei, ka kino hoki rānei te pānga mai o ngā momo whakaurunga mai o ngā mātua ki ngā whakatutukitanga ākongā.



Huahua 5. Ngā whakatau o te wānanga i ngā kōrero rangahau mō te pānga mātauranga o te tūhononga i waenganui i ngā kura, i ngā whānau me ngā hapori.

Tērā ka aro te hunga arataki kura ki te whiriwhiri i ngā taura here ā-mātauranga nei ki ngā whānau, ki ngā hapori anō mā te aho whakaako, mā te mahi kāinga, mā te herenga kura-kāinga anō. He mea nui hoki te momo mahi tūhono nei a te hunga arataki ki ngā wāhi e matara weherua ana te tikanga mātauranga o te kura i tērā o te kāinga. Tērā ētahi momo hononga kura-whānau e nui atu ai te pānga o te pai ki ngā huanga wānanga, tikanga tangata hoki o te ākongā, otirā ia o te hungā ākongā kāore anō kia noho ki te tēpu matua o te mātauranga, e noho tata ana rānei ki te pari, ka whara. Hei tauira, whai hua ai ngā take marautanga e whai wāhi ana ki ngā wānanga me ngā whare kōrero o te iwi. Ko tā te hunga arataki kura he tōtō mai i ngā taura mātanga o te iwi hei āwhina i ngā mahi o te kura. Kāti inā anō te hua o ētahi momo hononga kura-kāinga, he whakatika i ngā tikanga takahi tangata o te iwi.


Ehara i te mea ka pai katoa ngā hua o te whakapau taima, o te whakapau kaha, o te whakapau rauemi o ngā kura ki te āwhina i ngā whānau me ngā iwi, ka iti noa te pai i ētahi wā, ka kino kē rānei te pānga ki ngā huanga ākongā. Hei tauira, he mea tautoko, he mea takakino rānei te mahi kāinga ki te ākongā, ka eke rānei, ka hinga rānei i runga i te āhuatanga o te whakaritenga o taua mahi kāinga. Waihoki, he nui ngā mātua e kaha āwhina ana i ā rātou tamariki pakupaku ki te pānui, tērā ka hōhā, ka hē hoki kāore i te pai mō rāua tahi. Pai kē kia whai kaupapa āwhina ngā mātua ki te whiriwhiri tōtika i ngā mahi kia hua mai ai te pai.

Ka nui rānei, ka kino rānei ngā hua o te hononga kura-kāinga, kāti he mea nui kia tīkarohia ngā hua o te rangahau, o te whakatipu hei whāriki i ngā mahi o te kura, o te hapori, o te hunga arataki kaupapa hoki i a rātou e whakapakari ana i ngā taura here mātauranga.

Te mōhiotanga, te pūkenga, te āhua o te kura amorangi wānanga

Ko tā te Kōrero Tāpiri 8 he tuitui i ngā kete e rua o ngā āhuatanga o te rangatira, ā, he whakamārama hoki i ngā momo mōhiotanga, ngā momo pūkenga, me ngā momo āhua i roto i aua kete.

He iti rawa ngā kōrero rangahau e whāwhā tika atu ana i te hononga i waenganui i te mōhiotanga, i te pūkenga, i te āhua (KSDs) o ngā manukura me ngā huanga ākongā. Hāunga, ka herea rawatia e mātou ngā āhuatanga rangatira ki ngā huanga ākongā, ka kitea e mātou ētahi kōrero rangahau mō ngā mōhiotanga me ngā pūkenga hei pupuri mā te hunga arataki kia taea e rātou ngā āhuatanga i kōrerotia ake nei te whai.



Huahua 6. Ngā mōhiotanga, ngā pūkenga, ngā āhua o te tikanga arataki

Kia whakairihia ngā whiringa whakahaere ki te tāhū o te kaupapa tōtika

Tino mōhio te hunga arataki whaimana ki ngā kaupapa whakaaro me ngā kōrero taunaki mō te ako tōtika, ā, ka tīkina atu tēnei mōhiotanga hei pou pou i ā rātou whiringa whakahaere i ngā take pērā i te whakarōpū ākongā, te whakamātautau kaiako, te whiriwhiri rauemi, te tiaki kaiako hoki.

Te tātari, te whakatau hoki i ngā take whiwhiwhi

Rapu ai, mōhio ai ngā kaiarataki tōtika ki ngā tikanga me whai mō tētahi take, ā, ka tīkina atu, ka whiriwhiria kia kitea te whakatutukitanga mō taua take e tika ana i taua wā, i taua wāhi hoki.

Te whakawhanaunga

Ahakoā mōhio pai ai te hunga arataki ki ngā kaupapa ako, ki te whakatau take hoki, kā kore e whai hua menā kāore i te kaha whiria ngā taura whanaunga o te kura. Ko te āhua o te kaiarataki tōtika i āna mahi noa he whiriwhiri i ngā taura whanaunga mā roto i te tikanga mana tangata; mā te whakamihi ake i ngā kaimahi, i ngā mātua, i ngā ākonga hoki; mā te whakatauirā atu i te mātāu, i te mana i roto i ngā mahi; mā te whai tonu i ngā take menā kāore i ea ngā hiahia; mā te whakamana i te kōrero; mā te tohe hoki ki te hē o te whakaaro, ki te hē hoki o te mahi.

Kia māhorahora te kōrero wānanga

Ko tētahi mea me tino whai wāhi ki ngā āhuatanga rangatira katoa ko ngā pūkenga tikanga tangata me ngā tikanga o te ngākau e noho ai hei āhuatanga whakamahara mā te hunga arataki ki te whakamātautau i ōna ake pōhēhētanga me ērā anō o ētahi atu mō rātou tonu, mō ētahi atu, mō te āhua hoki o te mahi. Ki te māhorahora te kōrero wānanga, me whai pūkenga, me whai whakaaronui ngā kaiarataki kia āhei rātou ki te whakawhitwhiti kōrero, hāngai taikaha nei, me te mau ki te mana o te tangata, koinei hoki te āhua o te whakapakari i te whakaako me te ako.

Hei kupu matua

- He mea nui te amorangi wānanga. Ko te kupu matua o tēnei kete kōrero BES, ki te tata atu ngā manukura ki te matua o te ako, tērā e nui atu ai te hua o te pai mō te hunga ākonga. He mea ārahi ngā āhuatanga nei ki ngā momo tikanga arataki e whai pānga ana ki ngā huanga pai o te ākonga. Mā te whakamārama atu me pēhea, he aha hoki ngā take e whai pānga ai ia āhuatanga ki ngā huanga pēnei, e āwhina atu ai mātou i ngā manukura ki te whakariterite i aua āhuatanga i ō rātou nā kura. Ka whakamārama tēnei o ngā kete i ētahi o ngā mōhioatanga, pūkenga, āhua anō o te tikanga arataki e pou pou ana i aua āhuatanga rangatira.
- Ko te whāinga nui mā te amorangi wānanga me tino mōhio ki te mahi matua o te ako. Me mōhio rawa anō hoki ki ngā tikanga hiranga o ngā hononga kura-kāinga me te mōhio me pēhea te manaaki i ēnei hononga menā rerekē ana te tikanga mātauranga o te kura i tērā o te kāinga.
- E kore e tōtika ai te rere manukura i te toi wānanga anake; me whiriwhiri tonu te hunga arataki i ngā muka here tangata hei hāpai, hei whakauka i ngā hua papai o te whakaako me te ako. Ka whakawhirinaki atu te tangata ki te rangatira mau i te tangata, manaaki i te tangata, whakamana hoki i te kaupapa. Mā te hunga arataki pēnei e pakari mai ai te kimihanga, te hāhaunga, te mahi ohu hoki e rangatira ai te kura.
- Ko te tikanga arataki te mea nui, hāunga anō te kaiarataki. Ko te take, kāore e taea e te kotahi ngā āhuatanga katoa te whakatutuki. Ko te whāinga kē, me whai wāhi ngā kura katoa o Aotearoa ki ēnei āhuatanga i roto tonu i ō rātou kura, i waho rānei. Mā konei e whai whakaaro ai ki ngā kaupapa whakapakari, whakamātautau hoki i te tāhū manukura, me te whakatipu anō hoki i ngā tapu ngāio hei āwhina i a rātou i ēnei mahi whakatara.
- I pau kē te rangahau mō te amorangi wānanga ki ngā take e pā ana ki ngā tūhononga i waenganui i te hunga pakeke o te whānau o te kura, kāore i hāngai ki te pānga o ngā tikanga arataki ki ngā huanga ākonga. Heoi, ka nui ake tēnei pānga menā ka kahawhiria te ariā me te whakaritenga o te tikanga arataki ki ngā taunakitanga mō te tōtika o te whakaako me te ako.